



Imminut toquttarnermut peqqutaasinnaasut suunersut, inuiaqatigiinnilu akisussaaffik qanoq inissisimanersoq pillugu Inatsisartunut apeqquteqaat aallaavigalugu oqallisissiasatut siunnersuut.

(Inatsisartunut ilaasorta Aqqalu C. Jerimiassen, Atassut)

Inatsisartunut ilaasortap Aqqalu C. Jerimiassenip oqallissaarummik matuminnga pingaarutilimmik, imaannaangitsumillu oqallisigisassanngortitsineranut qujanaq.

Oqallisiginnaasatsinni imminut toquttarneq imaannaannginnerpaat ilagaat. Amerlanersaasugut annaasaqarsimasunik ilisarimasaraqrugut. Ilaqutaq, ikinngut, affarlerisaq, suleqat imaluunniit inuusuttunnguaq ingerlariaqqissinnaanani misigisimasoq. Siullermik eqqugaasimasut tamaasa Demokratinit misiginneqatigingarpagut.

Inuk imminut toqukkaangat alianartumik, tuparujussuarnermik, imminut pisuutinnermik, apeqquterpassuarnillu akineqarsinnaanngitsunik kinguneqartarpoq. Tamanna pillugu sammisaq annertuumik mianersuussisumik oqallisigisavarput. Assuarliinata, oqitsorsiorlutalu nassuiaanata, isumassuisumik, unneqqarissumik, ilaqutariippassuillu amerlavallaarujussuartut anniaatigisaat ataqqillugu oqallisigisavarput.

Imminut toqunnermut patsisaasoq qaqutikkut ataasinnaasarpoq. Kiserliorneq, kingunerlutsitsineq, tarnikkut nappaateqarneq, kanngusunneq, aningaasatigut ajornartorsiuteqarneq, sumiginnaaneq, annaasaqarneq, immikkoortutullu misigisimaneq patsisaaqataasinnaasarput. Tamanna pillugu pitsaaliuineq assigiinngitsutigut aamma pissaaq.

Ilaqutariinni, ikinngutigiinni, atuarfimmi, suliffimmi, najukkamilu inuiaqatigiinni inunnik artorsaateqartunik takunninnissatsinnut pitsaanerulernissarput Demokratinit pingaaruteqarpoq. Qanoq innitsinnik aperinissatsinnut sapiutissanngilagut, akissutaasorlu imaannaanngikkaangat ikiuinissarput sapissanagu.

Ataatsimoornermik nukittunerusunik aamma pilersitsissaagut. Kiserliorneq nipaatumik annertusiartuinnartilluni ulorianarsinnaavoq. Tamanna pillugu meeqqat, inuusuttut, inersimasullu orniguffiginnaasaannik toqqissisimanartunik amerlanerusunik pisariaqartitsivugut. Timersornikkuusinnaavoq, kulturikkuusinnaavoq, sunngiffimmi sammisassatiguusinnaavoq, oqaloqatigiittarfikkuusinnaavoq, nammineq kajumissutsimik ikiuunnikkuusinnaavoq, najukkamilu naapittarfikkuusinnaalluni. Inuit takuneqartutut, maqaasineqartutullu misigisimasut nukittunerusarput.

Ilutigisaanik ikiorneqarnissaq ajornannginnerusaaq. Inuk ikiortissarsioraangat, ikiuisussap orninnissaanut ajornassanngilaq. Piffissaagallartillugu oqaloqateqartoqarsinnaassaaq, katsorsartittoqarsinnaassaaq, tarnip



pissusiinik ilisimasalimmik oqaloqateqartoqarsinnaassaaq, tapersorsorneqartoqarsinnaassallunilu. Ajornartorsiutaasoq piaartumik iliuuseqarfigineqartussanngornissaa utaqqineqartassanngilaq.

Ikiortissarsiornissaq ajortuunngimmat ersarissumik tamanut oqariartuutigissallugu uagutsinnut aamma pingaaruteqarpoq. Tatigisat attavigiuk. Ilaquttannik, ikinngutinnik, peqqinnissaqarfimmi sulisumik imaluunniit Tusaannga oqaloqatigiuk. Kinaluunniit oqimaatsunik eqqarsaatilik kisimiissanngilaq. Ikiortissaqarpoq, inoqarporlu tusarnaarusuttunik.

Pinaveersaartitsinermi immitsinnut qanoq pisarnersugut aamma apeqqutaavoq. Inuiaqatigiinni, internetsikkut inuit naapittarfiini, tamallu oqallittarfianni sakkortuumik pinninneq inunnut sanngereersunut annernarsinnaasarpoq. Inuppalaarnerusumik immitsinnut oqaluunnissatsinnut tamatta akisussaaffeqarpugut.

Tamanna pillugu ataqqinnittumik, akisussaassuseqartumillu oqallinnissaq Demokraatit qilanaaraat. Pisuutitassarsiorata, kisiannili isumassuinerusumik, ataatsimoornernik nukittunerusunik, pisariaqartitsinerpaanullu pitsaannerusumik ikiuinissamut aqqutinik ujartuisumik oqallinnissamut.

Taakkuupput oqallinnermut Demokraatit maannamut isummersuutigerusutaat.